



Schweschdere.

Gugg mol, deß herzig Bildche,
Deß zerdlich Schweschdrepaar.
Die Klääh im forze Kläädche,
Midd schwarzem Auepaar;
Wie ehr deß roode Räbbche
So feck im Nagge sizd,
Wie se midd ehre Hänncher
Die lahme Schweschder schditzd.

Wie's rascher fordsegehe
Ehr in de Fieß ofd zuckt,
Wie se dann wie verschrogge
Wirrer zur Schweschder guggt,
Wie se dann dobbeld zerdlich
De Aarem um se lehd;
Iß nedd als ob e Engel
Nemer de Rahme gehd.

Un gehd's e Drebb enunner,
Un kummd e Schees die Schdrooß,
Do gugg nor, wie die Klähne
Nedd lugger loßd un loos,
Wie se die lahme Schweschder
Zuredd, se fehrd un schitzd,
Bis glicklich iwerem Fahrdamm
De Fuuß uffs Droddwah sitzd.

Wie schä" weer's wann im Lewe
Jerer so 's halle dehd;
Ähns soll 'm annre helpe,
Wo es aah gehd un schdehd;
Haschd aah noch graare Glirrer,
Aah du dhuschd mol e Fall,
Brauschd ännz, deß dich dhud schdize,
Dann Mensche sinn mr all.

